

DISSERTATIO INAUGVRALIS MEDICA

De

# FEBRI EPHEMERA,

IUSSV ET AVTORITATE  
ILLVSTRIS MEDICI ORDINIS  
IN ALMA SALANA,

SVB PRÆSIDIO

RECTORIS ACADEMIÆ MAGNIFICI,

GEORGII WOLFFGANGI  
WEDELI,

MEDICINÆ DOCTORIS,

COMITIS PALATINI CÆSAREI,

CONSILIARII ET ARCHIATRI DVCALIS SAXONICI,

THEORETICES PROFESSORIS ORDINARII,

H.T. FACVLTATIS MEDICÆ DECANI,

*Patroni, Præceptoris ac Promotoris sui*

*ad tumbam usque devenerandi,*

PRO LICENTIA

SVM MOS IN ARTE MEDICA HONORES,

INSIGNIA PRIVILEGIAQVE DOCTORALIA,

MORE MAJORVM,

LEGITIME ET SOLENNITER

consequendi,

*publicæ censuræ exposita*

à

FRIDERICO Siesmann/ Cassoviensi Hungaro,

IN AVDITORIO MAJORI,

Horis ante- & pomeridianis

consuetis,

*Ad d.*

*August. M DC XCVI.*

---

JENÆ, LITTERIS NISIANIS.



DEO TRIVNI,  
PATRONIS,  
PRÆCEPTORIBVS,  
PARENTI ATQVE PROPINQVIS  
SACRVM!

24697





## PROOEMIUM.

**V**ulgatum est dictum, quod cito fit, cito perit, neque tamen vniuersale, nisi addatur, cito obseruatum, nec neglectum. Facile oboritur flamma, sed citra hanc cautelam, breui incrementum capit, pessundans & stragem edens calamitosam.

Hinc aureum monitum est diuini senis : μηδὲν εἰκῇ , μηδὲν ὑπεροπᾶν , *nihil temere habendum , nihil negligendum*, quod vt in bello verissimum , ita longe magis in hostico morborum insultu, & maxime publico ac vniuersali, febri puta.

Verum est, non raro desinit opinione citius febricula, velut nubecula cito transitura apparens, sed nusquam tuta fides, in morbis quoque vbiuis cauto opus est. Vbiuis τὰς ἀφορμὰς , ἐπέθεν ἡρξάτο κάμειν , σκεπτεσθαι , *occasioes unde quis agrotare coepit , considerare oportet.*

Omniū horum & singulorum exemplum præbet Febris Ephemera, cuius disquisitioni vberiori, loco Dissertationis Inauguralis, dum nos accingimus, diuinum supplices adimus numen, vt feliciter omnia cedant!



## CAPVT I.

De

*Definitione Nominali.*

Um nomina sint rerum inuolucra & signacula, non incongruum fuerit, vt *Ephemeræ* genius facilius exhauriatur, ONOMATOLOGIAE eiusdem euolutionem præmittere.

Quod attinet vocabulum *febris*, perinde fuerit, an a *feruore* illam putemus dictam, licet *Paracelsus* erroneum id existimet; an ab ipsis *Febris*, quæ καθάρματα notant, feruore olim ac flammis apud Romanos secreta. Vtrumque in febribus habet locum, calore enim naturali blando in feruidum mutato efferuescit corpus, vriturque, quo massa sanguinea demum despumatur, & lustratur. Mittimus alias deriuationes, vt a *Februo*, infernalis ignis Deo, Græcis alias *Pluto* dicto; vel a *feritate* morbi; aut a pisce *Febrio*, capienti eum statim febrim inducente.

Rectius a *ferueo*, quod igne supposito, caleo, bullio, notat, appellationem sortitur, naturæ febris magis congruam, siue feruore concepto ab extra, vbi ambitus corporis instar aquæ feruentis ab igne & motu continuato æstuat; siue potissimum ab intra. Hinc a Latino Germanica quoque vox *Sieber* leui literarum immutatione descendit. Græcorum vero nomenclatura idem confirmat, quibus febris πυρ, πυρελός ab igne & æstu dicitur, vti & *Hippocrati* πυρεξις audit, q. d. habitus seu dispositio ignea, vbi calor noster natus in igneum, iuxta *Galenum* 1. aph. comment. 14. conuertatur, non tamen re ipsa est ignis, sed quod talem febris habeat naturam vel quasi.

*Ephmera* vero appellatur ab ἐπὶ τῆς ἡμέρας ad diem, velut vnicum diem durans; quamuis & aliis deriuari videatur aliunde, fingentibus sibi allusionem quandam a *Φαινο* lu-



ceo & ἡμέρα dies. Quicquid horum sit, nomen hoc ab Hippocrate iam usurpatum antiquissimum est, & non sine ratione impositum; quippe febris hujus, autore Galeno l. 9. M. M. c. 1. vnicus est paroxysmus, vt plurimum vno die ex ipsius natura circumscriptus, vt terminum suum intra XXIV. horas absoluat, nec facile vltius protrahatur.

Insuper ob analogiam temporis seu durationis, quam habet, πολύσχημον est vocabulum, & multis rebus tam naturalibus quam præternaturalibus aliisque est commune. Imponi enim consuevit ex rebus naturalibus & quidem primo in regno Vegetabili variis plantis. Sic Dioscorides l. 4. c. 84. & 85. duplici plantæ tribuit, bulbo scil. agresti, colchici, Zeitelosen / speciei; quod fungorum instar venenatorum suffocet, vnde & Theodoro Colchicum hoc strangulatorium dicitur. Alteri vero speciei Iridis, quod vno die flores amittat, Ephemerum non lethale Matthioli l. 4. c. 8. Lobelio vero ephemerum liliflorum audit. Sunt, qui etiam lilium convallium hoc nomine saluant. Inter exotica datur etiam planta bicapsularis, radice fibrosa floreque bipetalo, Ephemerum Virginianum denominata.

Porro ex animalibus designat Ephemerum animalculum, quod apud Hypanem fluvium, in Bosphorum Cimmerium fluentem, sub solstitio æstiuo obseruare licet, desert enim ille fluuius, referente Philosopho l. 5. c. 19. histor. anim. veluti folliculos acinis maiores, ex quibus animal volucre ac quadrupes erumpit, quod in postmeridianum usque diei tempus viuit ac volat, mox vero descendente sole marcescit & languet, occidente deinde moritur, vitam non vltra diem vnum agens, vnde Ephemerum seu hemerobion appellatum fuit. Huius descriptionem & sectionem cum figuris Thevenot, in syll. Itinerum, habet & ostendit, non nasci sed prodire ex verme; in cœnosis Rheni & Vahalidis ripis per annos tres latitante, paucisque inde horis viuere. Conf. Act. Lips. An. 83. p. 331. Scripsit de hoc integrum tractatum, qui ephemerum depingit & ad hominis vitam moraliter applicat, Schwammerdammius, in asserua-



tione & collectione insectorum aliorumque animalium celeberrimus.

Tribuit idem nomen & culici vinario *Ælianus l. 2. de anim. c. 4. p. m. 73.* Animalia, inquit, ephemera idcirco sunt appellata, quod id ætatis viuunt, vt vno die cursum vitæ conficiant; ex fece enim vini aclescentis originem trahunt, apertoque dolio, vt in lucem suscepta sunt, e vita excedunt.

Vsitatius vero nostro sensu prædicatur ephemera de rebus p. n. & quidem primario de febris nostra, quæ a tempore durationis proprie & κατ' ἐξοχήν ephemera simplex seu exquisita dicitur. Improprie vero & latius paulo de synocha non putrida, seu ephemera plurium dierum, quatenus ex priori degenerans & producta naturam aliam haud subit, sed solum terminum ad plures dies extendit, gradu saltim differens.

Interdum vero & Hecticæ tribuitur, sed itidem αἰνῶς magis, ob analogum caloris vniformem decursum, vt *Helmontio l. de febb. c. 9. t. 23.* febris tabida siue hectica quædam est quotidiana diaria, a corrupta cibi parte, mox sumptis cibis repetens. Hanc ob causam etiam sudori Anglico ephemeræ nomen, licet cum addito malignæ, inditum, dum nimirum intra XXIV. horas cum sudore, vt ephemera simplex, terminata, fuit.

Audit alias Græcis ἐφήμερος, ἐφήμερος πυρετός, πυρετός, πυρετός, Latinis conuenienti quoque vocabulo *Diaria* vel febricula dicitur, *Celso* quæ semel tantum accedit, deinde desinit. German. ein subtil / eintägiges Fieber / *Platerus* Carfunkel nominare amat, quod tamen nomen apud nos saltim minus in vsu est.

## CAPVT II.

De

### *Definitione Reali & Subiecto.*

**P**Ræmissa nominis explicatione ad ipsam ephemeræ DEFINITIONEM realem progredimur, quæ sequentibus commo-  
de



de potest absolui, quod sit *calor leuius efferatus in toto, a fermento rarefactino occasionali, facile subiungabili, in massa sanguinea exortus.*

GENERIS locum merito tuetur forma seu essentia, in quo consistit & quo posito ponitur febris, quod constituit calor efferatus in toto. Pressius enim paulo dicit intemperiem calidam vniuersalem, siquidem intemperatum adesse calorem & humidi consequenter subdominium per efferationem simul innuitur. In eo autem formalem rationem febris consistere non est vt multum contra dissentientes probemus, cum febris sine calore concepta, reuera sit non ens. Essentiale enim febris requisitum a Galeno l. 1. de diff. febb. c. 3. propositum, est calor p. n. seu modo & gradu in corde ascito naturalem excedens, & per totum corpus delatus, & huius indiuiduus comes pulsus citior seu naturali celerior. Quæ ipsa adesse, sensus & querela ægri, phænomenaque sufficienter testantur.

Calor hic efferatus omnino est morbosus, contrarius enim naturali, qui in calore blando, sanguinis & feri miscela, proportionem & motu æquabili consistit; vbi vero a statu naturali deflectit, seu modo & gradu superaddito excedit & præternaturalis fit, non amplius blandus manet, sed efferatur.

Efferatus hinc est principaliter ad intra, in radice & centro, effectiue magis ratione fontis ac originis, omnis enim calor vt naturalis, sic & præternaturalis in radice vitali seu corde quærendus. Hinc complectitur simul calor efferatus quoque sanguinis motum turbatum, mutationemque caloris magis radicalem. Idem in effectu est ac archeus irritatus, accensus, efferatus; indignatio siquidem ejus non contraria est calori efferato. Cum enim actionum in corpore præsides sint secundarii spiritus, seu archeus, sequitur his turbatis ac efferatis etiam lædi actiones secundum naturam, quæ læsio & impotentia vt in omnibus morbis, ita & hic in archeum redundat, vt conflictetur, repugnet & indignetur. Efferatur item ratione qualitatis & gradûs; est quidem idem calor numero & specie, non a naturalis, sed a ascito, gradu a-

scito



scito immutatus, qualitate alterata & intensa præter naturam, dum naturalem harmoniam transcendit, improporcionatus sic redditur vitæ incolumitati, hinc læditur sanitas, archeus, & actiones exercendi secundum naturam potentia.

Efferatus porro dicitur adæquate ad extra, seu in toto, affectiue magis, partibus enim extimis & toti corpori internus qualitatis calidioris status communicatur & inducitur. Et licet horror major vel minor præcedens, tanquam contrarius calori, obstare videatur; aliud tamen est initium ipsius conflictus, aliud paroxysmus, seu febris ipsa potius. Primo impetitur calor, & concentratur, hinc insurgit & diffunditur, adeoque in vniuerso habitu, capite, lingua, oculis, manibus, pedibus, intemperatus status caloris patet. Hinc & in centro suo ac radice exerit se præcipue calor febrilis, & in ambitu diffusus.

DIFFERENTIAM SPECIFICAM absoluit genius febris ephemeræ, qui consistit in gradu efferationis respectiue minori, quod calor sit leuius efferatus, seu levis & mitis. Communem quidem sortem habet hæc cum aliis febribus, quod ad ignem accedat & efferatus extraneus & peregrinus sit natus calor, sed in eo differt, quod ejus energia ac euidencia variat pro differentia ipsius intemperiei. Hinc in ephemera non adeo viens, vt in causo, ac putridis aliis, quia simplex caloris hic accensio citra corruptiuam infectionem humorum, a qua ut plurimum acris & molestus sentitur, sed adest caloris respectiue suauitas, quæ a *Galeno l. 1. de diff. febb. c. 7.* proprium ac inseparabile huiusmodi febrium dicitur indicium, conueniens omni, soli ac semper; vnde & *Ebnfina l. 4. fen. 1. Tr. 1.* calorem scribit non esse acrem, nec mordacem, sed talem, qualis caliditas corporis laborantis & ebrii.

Notio ergo huius febris specialis patet i. a priori, ratione causæ, quod sit occasionalis, nam ephemera supponit causam procatarcticam, sed non contra, quod *Galenus* testatur, cum *l. 1. M. M. c. 4.* asserit, vnum ac præcipuum diariæ esse indicium, ab aliqua causa prægressa incepisse, recenti ac euidenti, quam medici appellare consueuerunt procatarcticam, id quod tamen  
de



de simplici & exacte tali ephemera intelligendum, minus de symptomatice. (2) a *posteriori*, accidentali febris constitutione, a duratione & tempore ratione typi. Mos enim huius febris ad extra est, quod breui decursu suum consequatur terminum, quod ipsum innuimus, addito, facile subiugabili. Est quidem febris suo modo continua, indefinenter enim affigit, nec interiectam habet pausam; at quoniam causa occasionalis non tam firmam impressionem intulit, & fermentum inductum ab ea minus est tum mole, tum virtute, facile a natura subigitur & euanescit, ut efferatio exinde enata caloris levis ac transitoria saltem persistere queat.

Jam ad SVBIECTVM deuoluimur, quod ipsum, ut eo clarius pateat febris nostræ focus & locus, diuidere licebit in proprium & commune, seu subiectum causæ & morbi.

SVBIECTVM CAUSAE alias dictum inhaesionis & radiationis, ubi minera morifica residet ac stabulatur, est massa sanguinea, communis febrium nidus. Nam cum omnis temperies a spiritibus, sanguine & sero, utpote humoribus radicalibus & similaribus, scaturiat & in iis fundetur, necesse est & intemperiem h. l. febrilem eos habere pro subiecto suo, siquidem febris prius se exerere nequit, quam per massam sanguineam causa in ea latitans demum communicetur cum corde, & huic eius effectus inseratur, calorque sic innatus turbetur, exasperetur & flammam concipiat.

Communi suffragio subiectum causæ statuuntur spiritus vitales, quod spiritus sit pars sanguinis tenuissima & exhalabilis semper, ut subinde de nouo generari opus habeat: cum vero febris huius periodus brevis sit ac diaria, saltem, fieri non posse, quin subiectum eius quoque cito sit dissolubile ac alterabile, hinc radicari eam in spiritibus magis, nondum fermento corruptiuo seu putredine massam sanguineam infectam. Hoc quidem sano sensu verum est & concedi potest, si intelligatur de gradu minori & affectione magis superficiali, quam centrali, transeunte quam immanente, cum citior motus spiritibus imprimatur, & ab his inferri soleat; At



si a sanguine distinctos & abstractiue sumptos intelligas, facilis fit confusio. Humores enim simul pati ex motu sanguinis & pulsu concitatori caloreque vaporoso seu insequente, sudore liquet, unde merito pro subiecto causali massa sanguinea habenda, & sic spiritus in concreto cum sanguine sumendi, cum calidum innatum & humidum radicale, vt & spiritus vitalis nullus detur, & in rei veritate nil aliud sit, quam sanguinis & feri *ἐνέργεια* ac iusta dispositio. A potiori vero partem sanguinis subtiliorem spirituum nomine venire hodie in confesso est.

*Helmontius* quidem de febb. c. 9. t. 23. & c. 10. t. 7. ephemeræ subiectum stomachum statuit, vbi vult illam in eius cauo plerumque ex vitiatō cibo sedem habere, quod eo probare conatur, quod facile vomitu peracto cesset; sed hoc subiectum nimis est remotum, & non concedendum, nisi sit a cruditate & repletionē ciborum & chyli cum massa sanguinea, hinc communicata, & sic motum tumultuantem & peregrinum calorem inducente.

SUBIECTVM MORBI est duplex, vnum particulare, PRINCIPALE alias dictum, vbi febris se exerit primo, quod vt in genere ita & hic in specie COR agnoscitur. Illud enim affici primario in omni febre necesse est, siquidem non potest calor præternaturalis effundi aliunde in vniuersum corpus, nisi a corde, quod fermento peregrino incalescit prius. Enimvero, cum febris natura in caloris intensiōe consistat, nulla febris fieri, multo minus dici potest, calorque reddi effe-  
 feratior, nisi in corde tanquam caloris fonte accensa & subor-  
 ta sit, puta cum sanguine sumpto, quæ causæ lociæ merito  
 stant pro vna. Febrem autem cor proxime sustinere ex a-  
 ctionibus eius læsis, calore scil. & pulsu præternaturali, colligi  
 potest luculentissime.

Alterum vero subiectum VNIVERSALE, seu secunda-  
 rium, quod & ADAEQUATVM audit, quousque se exten-  
 dit ac penetrat calor febrilis, est totum corpus, quatenus  
 miasma fermentificum ac febrile, mediante sanguinis circu-  
 lo



lo, per arterias cum omnibus ac singulis corporis partibus communicatur ac infertur, inque illis varie actiones lædens, sensibus se offert.

## CAPVT III.

De

*Causa immediata & mediata  
proximiori.*

**M**Isso subiecto, vt CAVSAS jam lustremus, ordo expositulat. IMMEDIATAM hanc & proximam dicimus esse rarefactionem fermentificam vitiosam, seu expansionem & motum impropotionatum humorum vitalium. In statu enim corporis naturali sanguis & serum, tanquam liquores vitales balsamici, calorem & vitam præbentes, blande in vasis decurrunt & mouentur, suauiterque partes afficiunt. Cum vero particulae sanguinis sulphureæ oleosæ volatiles & serosæ, ob agitationem fortio rem & fermentationem præternaturalem, expanduntur, rarefiunt plus iusto, exaltantur, massa sanguinea turbatur, ebullit & motum ferociorem subit, quibus sic in perpetuo motu irrequietis & agitatæ calor intenditur, efferatur, molestus fit & actiones lædit, e natiuo blando in igneum febrilem, ex fouente in depascentem degenerans.

Non abludunt adeo, quin ad bonum sensum facile trahi possunt, qui cum *Helmontio* inculpant archeum furibundum, febrimque accersentem, neque enim sibi morbum fabricat aliter, quam ab obiecto impropotionato, eiusque imperio sic non relicto integro; qui item turbatam mixtionem sanguinis accusant, quo ipso paulo remotius exprimitur essentielle febris, citra modi notionem, in quo turbatio consistat.



Rarefactionem hanc febrilem fouet CAUSA MEDIATA PROXIMIOR, fermentum h. l. occasionale & facile subiugabile. Omnes vero febres a fermento & quidem peregrino alterante & mouente, vno verbo turbatiuo, oriri necesse est. Posita enim in omni febre caloris intensio, œconomia & circulatione sanguinis turbata, causa redundat in archeum, seu motorem primarium. Quoties igitur in eius sacrarium infertur peregrinum quoddam inæquale, aduersum, improporionatumque massa sanguineæ, & qualitas, seu modus miscelæ, *κρᾶσις*, & motus, & consistentia sanguinis turbatur, vnde arrheus irritatus insurgit luctamque init cum eo, idque expellere conatur. Per fermentum autem intelligitur obiectum aliquod heterogeneous inæquale, quod miscelam & crasin sanguinis turbat ac disiicit, adeoque naturamque impetit ac irritat.

Adesse vero fermentum a priori patet, quod constat particulis heterogeneis salino-sulphureis, simulque elasticis, quod tertium fermentum specificè denotat & ex prioribus duobus emergit principiis. Salium enim ac sulphuris inæqualis miscela ac concursus contrarius inducit fermentum, vt sic in omni fermentatione hæc duo vtramque absoluant paginam. Principium vero actiuum primum salinum apparet in fermento, dum sulphur & h. l. vitale sanguinis balsamicum, varie resoluerè, expandere, in motum citare & destruere valet; sulphureum vero alterum, quatenus a salibus agitatum & exaltatum, sanguinis motum alterat, & in corde penitus euolutum & accensum, deflagratione sua calorem innatum simul efferat, quod testatur æstus abundantia.

A posteriori porro liquet, quod sit propagatiuum sui ac immutatiuum, ne dicam sæpe destructiuum, vtpote proprium & essentialè omni fermento. Dum enim hæc principia se inuicem acuunt, rarefactionem fermentificam peregrinam toti massæ inferunt. Hinc lymphæ incoquitur & diffatur, sanguis incrassatur & acrior feruidiorque consurgit, verbo, inquit & efferatio caloris, sicque febris oritur.

Quale autem illud sit h. l. breuibus in genere dispiciendum.

Sci-



Scilicet *inaequale* est, ob principiorum heterogeneousitatem, cum particulæ inæquales cum sanguine & sero minus miscibiles, nec vniri, assimilari & concordiam humorum conseruare aptæ, hinc turbas mouent, confusionem & sanguinem nimis discontinuando rarefactionem pariunt.

Est porro *occasionale*, hinc inductum magis quam in sanguinis vndis conceptum. Impellunt enim ad hanc febrem corpus inprimis dispositum errores diætæ, seu res non naturales vitiose vsurpatæ, quæ reuera sunt occasiones tales externæ, & sic euidentes & mox manifestæ, qualitate calida & motu magis peccantes, fermentifica humorum *ἀναστροφή* inde concepta, materia vero minori materia vero minori magis dissipabili, volatili & transitoria. Hinc non immanens est fermentum, hoc loco, sed *transiens* & *facile subiugabile*, quatenus qualitas impressa haud difficulter ex subiecto suo se expelli permittit, nec sanguinis massa illam seruare diu potest, denuo semper regenerata alterataque a natura, sublata inprimis statim ac orta febris, moderatave illius causa, breui sic, saltem durante conflictu & *ἐπισημασία* febrili, permanens.

Qui aliis terminis vtuntur, seu acidj, seu venenosi quoque, re ipsa nil nisi fermentum tale immutatum intelligunt, neque difficulter conciliari & ad bonum sensum trahi queunt. Vt vero melius hæc pateant, liceat nobis ex re ipsa probe considerata statuere esse ephemeram, non minus ac erysipelas, primum modum & gradum, seu speciem febrium continuarum, leuiorem puta; cuius affinis est & symbolicum tum erysipelas, tum synochus; illa differentia inter alia, quod erysipelas a causa magis interna, ephamera a causa magis externa vel quasi tali oboriatur, synochus medio modo se habeat; fieri vero ephemeram a fermento bilioso lymphæ illato, potissimum a spiritibus fortius agitatjs & motis, quod ex sequentibus patebit. Ita vero omnia facili negotio liquent.



## CAPVT IV.

De

*Causis mediatis remotioribus.*

**C**onsiderandæ hinc veniunt CAUSÆ MEDIATÆ REMOTIORES, quas diuidere licet in προϋυμένην, antecedentem, dispositiuam, & προκαταρτικήν, seu occasionalem.

Prior illa non penitus excludi potest; cum enim omne agens agat ad modulum receptiuitatis subiecti, consultum omnino est illam quoque attendere. Complectitur vero RES NATURALES, quæ sunt modi ac dispositiones tales internæ, in temperamento, habitu corporis, ætate &c. locatæ.

Inter TEMPERAMENTA & huc facit *sanguineum* & *cholericum*, seu seorsim, seu coniunctim, in statu mixto, spectatum, qualis enim modus sanguinis & seris, talis sanitas, & contra. Et si enim in illo sanguis & serum, seu particulæ oleosæ balsamicæ & humidæ & volatiles, quantitate & qualitate se inuicem probe temperent; attamen cum facile excedat, humiditate præcipue, facilis hinc via est ad putredinem & accensionem febrilem; vid. D. *Pres. Physiol. med. sect. 2. c. 11. p. 82.* Visendum id in plethoricis, vbi si sanguini exuperanti & copię vaporum nulla datur porta, subnascitur facile ebullitio præternaturalis, & motu maiori illato calor sic intenditur. Nullum quoque magis temperamentum feбри huic velificatur, quam *cholericum*; hoc enim ob particulas sulphureas volatiles intensas, humidis vero blandis depressis, bilis generationi, indeque humorum exaltationi præprimis inseruit, siquidem fuligines calidæ & siccæ, vt tenuiores & mobiliore, colliguntur, cumulantur & acriores fiunt, conceptoque feruore (dum in se inuicem furere coguntur, substrato in quod alias agerent humido insufficiente,) promte accenduntur. Hinc biliosi ad efferationes eiusmodi magis propensi sunt, si inprimis diutius jeiunent vel vigilant,

vel



vel exerceantur, aut simile quid, vt excandescantia, ipsis acci-  
dat, quod calorem exasperare & spiritus accendere valet. Vid.  
*Sennert. l. 1. de febb. c. 6.*

Nec abnuat HABITVS CORPORIS densior & obesior paulo, vbi meatus angustiores cutisque strictior & siccior, unde per insensibilem transpirationem fuliginosæ superfluitates ad exteriora mitti nequeunt, quæ igniuntur quasi, coaceruantur, & accessione obstetricantis causæ alius acuuntur. Inter AETATES imprimis iuniores & adolescentes facilius hanc febrem incurrunt; vtpote qui calidioribus ac feruidioribus abundant humoribus & magis ad ebullitiones inclinant, ob quam causam & quandoque senes quoque illam experiuntur. Vid. *Forest. l. 1. Obs. 3. Schol.*

Sic & *Influxus Astralis* vel ἰσχυρὰ ἀστρία lymphæ suum contribuit, siquidem, teste *Plinio N. H. l. 7. c. 51. & Val. Max. l. 1. c. 8.* Antipater Sydonius Poeta, omnibus annis, vno die tantum natali, correptus est febre, & eo consumptus est satis longa senectæ, certo illo circuitu morbi. Facit huc exemplum, quod *Rhodus Cent. 1. obs. 2.* de Viro religioso Patauii degente refert, illum scil. certo certius sequenti die inuadebat ephmera, quoties per quietem pridie sibi visus fuisset pane candido in iure intrito clinicis panatella vesci. Natura forsitan huic alimento per morbum ipsi familiarem adsueta, quoties infestabatur, hac rei præteritæ velut imagine sensum excitauerit.

Sed maxime attendi merentur CAUSAE NON NATURALES, quarum data occasione externus error dispositionem in actum magis deducere potest, quas communi ordine, ratione modi agendi & afficiendi, quatenus prauo vsu, excessu vel defectu, positivæ vel priuativæ peccantes, corpus alterare & destructionem inferre valent, enumerare licet, diuidendo eas in internas & externas, seu, vt *Galenus* loquitur, quæ foris adveniunt & quæ a nobis ipsis proficiscuntur; illæ sunt aer, cibus & potus, hæ vero reliquæ. Inter has primus AER intemperie sua febrilem hanc inuitat. Præstat id calidior, moleculis sulphureis



phureis in motum agitatis, hinc & inspiratus per pulmones, & ambiens vi sua elastica ac expansiva sanguinem attenuans, eiusque circulum accelerans, lymphæ moderamen excutiens, & diffans plus justo, nimiam humorum rarefactionem inducens, adeoque corpus dissoluens, & morbificus euadens. Accidit hoc præcipue si iter, vel ambulatio diuturnior in solis radiis, tempore diei vel anni calidiori, instituatur, unde & in Hispania, aliisque locis zonæ torridæ vicinis frequentior observari solet. Faciunt huc quoque ventus australis, calor balnei inprimis Laconici, & thermæ, longius administratæ.

Idem, licet alio modo & infert frigidus nimis, quando quidem poros cutis constipando transpirationem sufflaminat, & lympham restagnare facit, vapores vliginosos facile fermentatiuos retinet, & sic euentatio ne lymphæ prohibita, tota massa, conspurcatur, turbatur & flammam concipit, non aliter ac flamma, nisi ventiletur aere, in se ipsam agit & opprimitur, fortiorque euadit, licet hoc modo vix diu subsistere possit. Hinc ob ventilationis defectum densius agglomerantur particulæ, & incallescunt, non alia ratione ac fœnum nimis madide repositum, ob ventilationem prohibitam, particulis inde sulphureis a mixtione solutis sponte incendium recipit; sic & massa sanguinea, exaltatis jam particulis sulphureis ac efferuescentis, ebullit, aque crassi naturali tandem nimis immutata versus putredinem tendit. vid. *Willis. de febb. c. 7.* quod inprimis in degenerante in putridam videre est. Hinc qui per loca niuosa ambulant vel immergunt corpus aquis frigidis, stypticis, aluminosis, tophaceis, gypseis, quæ de leui obstructions inflammatorias producant, facile in febrem hanc incidunt.

Succedunt huic in ordine CIBVS & POTVS, nocentes improporzione quantitatis & qualitatis: illa iterum vel in excessu & positivè, facta nimia repletionè, vel inordinata & vitiosa varietate ciborum, cruditates, obstructions & varia fermenta generare apta, ut hinc cruditas nidorosa oriatur, vel pituitosa indeque diaria, autore *Tralliano l. 12. c. 1. p. 673. & 678.* Sic quoque a nauseabunda satietate & ebrietate, nimium ingurgitando



tando vini præcipue generosioris, sulphur inflammabile peregrinum cum lymphâ communicatum & a calore actuatam largius accenditur febrisque inducitur. Vel in defectu & priuatione, inanitione ex fame & siti, lymphâ enim sic plus justo exhausta, calor innatus, dum nihil vehiculi alimentique habet in quod agat, efferatur.

Qualitas vero assumptorum potiore causæ subit rationem, siquidem quæ calidioris sunt naturæ & biliosæ, rarefactioni velificantur, lymphæ φλόγωσι fermentificam & elasticitatem maiorem inducunt, sulphur seu particulas oleosas & salinas volatiles sanguinis augent & intendunt, calorem efferant, tale enim additum tali illud magis reddit tale, etiam vt h. l. cum noxa. Hinc toto die ephmera gignitur ex cibis calidioribus potuque generosiori & spirituosiori, vt sunt vinum Hispanicum, spiritus vini, aromata, piperata, medicamenta calidiora & acria, olea destillata, mel ipsum, de quo *D. Præses* exemplum obseruauit, quendam ex melle largius paulo assumpto, calore per 24. horas intenso correptum, donec iterum moti fluctus considerent. Similiter cibi acriores, vt sunt allium, cepæ, nasturtium &c. si abutaris eis, facile feruidiorem sanguini inducunt statum, idem etiam dictum esto de medicamentis. Obseruauit aliquoties *D. Præses* ab assumptis purgantibus, in tenerioribus & rarioris paulo habitus corporibus, etiam citra hypercatharsin, abortam ephemeram, euacuata paulo largius lymphâ, motu peregrino massæ sanguinæ inducto. Sic & extrinsecus admota medicamenta acria, caustica, vt vesicatoria, dropaces, sinapismi, vtricationes, spicula sua fibrillis nerueis infigunt, sanguinem in poris morantur, lympham acriorem reddunt, calorem excitant & exasperant.

SOMNVS quoque & VIGILIAE, lymphæ & spirituum alternationem dispensantes, huc faciunt. SOMNO quippe nimio ligantur spiritus, obnubilantur, immergunturque penitus humoribus, vtrisque inde, motu sufficienti cessante, vegetis alias, torpor infertur, insimulque, ob impeditam alimenti distributionem plenariam, & digestionem retardatam, collecti recrementitii humores facile fermentum concipiunt, vt hinc febris eph-



mera oboriri possit. Exemplum ephemeræ a somno meridiano allegat *Rhodius Cent. 1. Obs. 3.*

E contrario & VIGILIAE immodicæ, & lucubrationes nimis diu protractæ, corpus ad flammam promptius concipiendam haud exigue disponunt, dum spiritus, & cum iis lympham ad functiones necessariam, qui nunquam otiosi sed assidue agunt, nimium infumunt & eliciant, si maxime studiis simul superioribus impenduntur. Resolutis sic iis & a coquendi munere aliorum auocatis, digestio in primis viis languere incipit, chyli euolutio & distributio impeditur, inde humores fiunt acriores, bilis & cruditates adaugentur, corpusque exiccatur, spiritus vero ob continuam agitationem & absorptionem feruidiores redditi exasperantur & efferantur, sicque facile massæ sanguineæ inordinatus motus ac exæstuatio inducitur.

Par ratio est MOTVS corporis, qui si vehementior, cum violentia, fatigatione & lassitudine, transcendens ἐν Φορίαν, vires exoluit, spiritus in motum impetuosiores citantur, qui humores partim diffiant, partim ebullitione concepta cum spumosa rarefactione in maius spatium ampliari cogunt, non secus ac vina & spirituosæ de leui quavis occasione vel motu calefactæ, aut dolio strictius inclusa, feruorem concipiunt, elogio *Willis. l. de febb. c. 8.* Sic, syrio in primis vrente, exercitiis corporis variis, vt equitationibus, saltationibus, pugilationibus &c. immoderate vacando, concitator motus & feruor insolitus infertur spiritibus, qui, in corde expansi & rarefacti nimis, exinde motu rapidiori in totum corpus deferuntur, illudque exæstuaræ faciunt, & sic ephemeram accendunt. Sic quidam fortius per pedes tempore æstiuo iter faciens, per totam noctem sensit calorem insignem mane iterum cessantem, obseruatore *D. Preside.*

QUIES vero diuturnior & otiosa nil nisi cruditates parit, siquidem corpori motu conueniente denegato humorum circulus retardatur, calor vegetus obtorpet, restitant hinc excrementa fuliginosa, digestionem minus rite absoluta, coaceruata, impuritates massæ sanguineæ, ventilatione haud concessa, inferunt;



runt, quæ postmodum motum intestinum turbulentum seu fermentationem præternaturalem facile promouent.

EXCRETA porro & RETENTA dum naturæ legibus minus respondent, non minorem conferunt culpam. Cum nimium magis vtilia nimium quantum excernuntur, causæ priuatiuæ faciem induunt, spiritus & humores depauperant, viresque absumunt. Sic ab euacuatione nimia per sudorem, venæsectionem, purgantia *δυσήματα* fortius operantia, hæmorrhagias quascunque largius fluentes, lymphæ ac sanguis magis quam par est exhauriuntur, reliqua massa hinc magis improporcionata reddita, spiritus & pulsus citantur, calor efferatus, verbo, febris oritur.

Si vero inutilia retinentur excernenda, massam sanguineam conspurcando fermentum febrile inducunt. Sic *αδίαπνευσία*, ex obstructione pororum cutis, effluuia calida & sordida, sudore separari solita, cohibet, siue a stipante frigore externo aëris vel balnei, siue ab inuiscantibus sordibus cuti impactis orta, vnde particulæ facile fermentescibiles sanguini nuptæ, tumultuariam rarefactionem pariunt. Deficientibus mensibus, suppressis lochiis in recentibus puerperis, & lacte in mammis collecto & coagulato, febris lactaria & diaria sæpissime fit, quæ pro re nata ad aliquot dies producit. Spectat huc venus largior & immodica, sæpenumero ephemeram excitare solita.

ANIMI tandem PATHEMATATA quantum ad febrem, hanc producendam possint, claro clarius est, siquidem in spiritus & humores immediatum & summum quasi gerunt imperium, quibus excessive alterando, eos vel exagitando vel concentrando, facile labem inferunt. Inprimis ira, quæ veluti feruor & excandescencia sanguinis & febris quasi ipsa est, resolutis & dissipatis nimis in ea spiritibus caloreque cordis efferato, sanguinis ad exteriora motum fortius citare ac commouere facit, quod & in gaudio, licet minori vehementia, accidere solet. Tristitia vero, timor, mæror, curæ & sollicitudines spiritus circa cor retinent, deprimunt, coagulant, suffocant, e quibus fermentum occasionale in lympham deriuatum efferationem promptam progignit. Terrore quoque incusso, a peri-



phera ad centrum repentino recurſu ibi reuocatis ſpiritibus & humoribus, iisque coarctatis vis vnita quaſi fortior euadit, vt hinc exaſtuare & flammam ſuſcipere facile queant. Exemplum proprium allegat *Ant. Beniuen. l. de abd. morb. & ſan. cauſ. c. 62.* ex terrore flammæ e pauimento proſilientis inieſto. Plurimorum horum exempla vel apud *Galenum* abunde paſſim congeſta & obſeruata leguntur, nedum apud alios, vti & *Ebnſina* plurimum talium caſuum, vnde oriatur, ſeoriſim meminit.

RES denique PRAETERNATVRALES in cenſum quoque cauſarum veniunt, ſed ephemeræ fere nothas magis & ſymptomaticas quam exquisitas generant. Primo loco obſtructio laudanda, quæ vel interna ſeu cacochymica, cuius mentionem facit *Galenus l. 8. Meth. med. c. 4.* a ſucis ſcilicet vitioſis & impactis multis craſſis tranſpiratione prohibita retentis; vel externa, pororum cutis, de qua *l. de tuend. ſan. c. 3.* ſcribit: vapores occluſi incendium ſuſcipiunt facile ac diariam producunt. Deinde inflammationes partium leuioreſ ephemeram pariunt, ſiue ſint ſimplices & benignæ, vt ex eryſipelate frequenter accidere ſolet; ſiue ſimul complicatæ cum tumore & mali moris, ſine vlcere tamen manifeſto, eæque vel in locis externis, pluribus glandulis refertis, vt in bubonibus, teſte *Galeno ad Glauc. de art. cur. c. 7.* Hinc ſæpe tonſillæ intumeſcentes, ob lympham inæqualem & fermentificam redditam, febriculam talem citant. Sic & ex mammilla inflammata diariam ſubortam vidit *Foreſt. Obſ. 6. l. 1.* idem de furunculis, & tumoribus partium aliarum calidis valet. Id quomodo fiat, per ſanguinis & lymphæ circulationis leges hodie concipere perfacile eſt, abreptis cum reſſuis humoribus particulis fermentatiuis & cum fonte ſuo communicatis. Vel locis internis & viſcere nobili ac propinquo cordi, quod ſi inflammatione laboreat, ſuſcitari febriculam talem leuem & diariam non poſſe, nemo inficias facile ibit.

Fit quoque, vt a lipothymia, v. g. a terrore orta, ſubſequatur ephamera, ſpiritibus prius concentratis & diſperſis, hinc penitus inſurgentibus & agitatibus, donec in ordinem redeant. eluctati remoras in grumeſcentia lymphæ poſitas. Dolores



itidem harum vel illarum partium febrem hanc accendere possunt, quatenus ille spiritus continuo irritat, & juxta cum lymphā citatius impellit, vnde & vigiliæ & turbationes animi enatæ calorem efferant. Sic dolor colicus, hæmorrhoidum, furunculorum, nephriticus, a pernionibus, ab ambustis ephemeram excitare solet. Par ratio est vulnerum & fracturæ ossium, aliarumque læsionum dolorificarum; dolor nempe concitat spiritus, & hi simul humores. Sic & hæmorrhoides suppressæ fermentationem sanguini febrilem diariamque efficiunt. Coryza ipsa & catarrhi acres falsi ephemeram producere possunt, lymphā nimirum exasperata & fermentifica reddita. A vermibus quoque ipsis varii generis excitata visa fuit.

## CAPUT V.

*De Differentiis.*

**E**Nucleatis jam causis, supersunt DIFFERENTIÆ, quarum cognitio cum diagnosi & therapiam facili-  
tet, ad eas nos nunc accingemus considerandas.

Ratione FORMÆ seu generis, & quidem quoad speciem, alia ephemera est *primaria*, sibi relicta, solitaria, affligens per se, quæ antecedit putridam & hecticam, quatenus a causa occasionali euidenti, seu rebus nonnaturalibus minus congrue usurpatis, oritur; alia *accidentalis* & *symptomatica*, quæ alii morbo accidit, vel sequitur inflammationes particulares, seu a rebus præternaturalibus, ut bubonibus, doloribus magis orta.

*Complicata* alia ac comitata, quam vna stipant symptomata alia. Talem statuere possumus dari in erysipelate, doloribus dentium, ipsaque arthritide & podagra, quod *Helmontius l. volup. viuent. morb. t. 14.* affirmat, ubi aciditatem podagræ causam inculpat, hinc fit, *inquit*, quod natura persentiens illam aciditatem in spiritu, quam concepit ex semine seu characterē podagrico, confestim excitet febrem ephemeram ante podagræ accessum,



Quoad *normam* seu durationem, alia est *exquisita*, simplex, quæ καὶ ἐξοχήν, citra adjectionem, ἐφήμερος proprie & absolute sic appellatur, & re & nomine talis est, quæque normam & naturam febris ephemeræ exacte tenet ac obseruat, nec ultra diem naturalem extenditur, de qua potissimum agimus. Alia vero *minus exquisita* & magis degenerans & extensa seu spuria est, quæ cum additione, plurium dierum, ephemera improprie seu πολυήμερος πυρετός vel ἐκτεταμένος dicitur, quæque quodammodo re sed non nomine cum priori conuenit, quatenus ad plures dies durat & communiter synocha impu- tris audit.

Quoad *morem* seu genium, alia est *benigna*, mitior, qualis communis illa simplex & exquisita, salutari sudore iudicanda. Alia *grauior* & ferocior, complicata grauioribus symptoma- tibus, vti est syncope. Aliam Rhodius obs. i. c. i. notat, cum dolore capitis, vigiliis, deliriis & compressione pulsuum, aliisque signis à priuata corporis dispositione adeo horrendis, vt maligna videretur, semper tamen a robore naturæ largiori lotii profluuio solutam. Alia *maligna* & pestilens, mali moris, quæ ultra sphæram intemperiei simplicis symptoma- tibus prauis gaudet, vnde & quandoque epidemia magis ac contagiosa, qualis videtur fuisse ἰσπανός, sudor ille Anglicus dictus, qui etiam intra 24. horas sudore solutus, morteque vt plurimum terminari solitus fuit, conjuncta lymphæ fermenti- ficæ spiritibus infesta malignitate. Ex quo etiam fluit, ratione temporis aliam esse *indefinitam*, aliam *periodicam*, qualem Borellus Cent. 2. Obs. 100. meminit, quæ singulis trienniis castrensem caufidicum eodem tempore detineri solita est.

Ratione SUBJECTI, alia est *essentialis*, fitque in corde accensa lymphæ ac spiritibus primario, vt ex animi affe- ctibus & aliis rebus nonnaturalibus; alia est per *consensum*, aliunde communicato feruore, ex inflammatione, dolore par- tium aliarum, abscessu, tumore, luxatione, vulnere &c. lau- datis.

Ratione CAUSARUM, totuplex est, quot causæ illam progignere obseruantur. Tangemus vero solum, aliam esse a



*causa positiua*, a materia fermentifica lymphæ illata, vt ab ebrietate; aliam a *causa priuatiua*, calido efferato intensius per humidi absumptionem, euacuata plus debito lymphæ, tanquam vehiculo & inuolucro spirituum, ut a purgantibus &c.

Ratione *notarum differentialium*, differt ac distinguitur partim gradibus subordinatis a se inuicem, partim reliquis febribus. Sic nomine & gradu saltim a synocha imputri, a putridis vero aliis typo & a posteriori saltim differt. Tacemus alia, quæ ex superioribus clarent.

## CAPVT VI.

De

*Signis Diagnosticis & Prognosticis.*

**A**D curationem priusquam nos conuertamus, SIGNA vt penitus eruamus ephemeram testantia, & cognitionem ejus planiorem pleniorumque inferentia, debito tenemur jure. Cognitum quidem prima fronte non videtur admodum difficilis, verum accuratius & certius a posteriori, cessatione illa breui, noscenda.

*Imminentem* præsagunt signa cum aliis febribus communia, seorsim procliuis corporis in eam constitutio, ratione temperamenti habitusque corporis, consuetudinis; & maxime ipsæmet causæ procatacticæ prægressæ. Saltim vbiuis cauendum quoque, ne illis positæ vel prægressæ vt febris alia, ita & ephmera fiat, cum reliquis non confundenda.

*Præsentem* vero significant & notant ESSENTIALITER INHAERENTIA, vtpote signa inseparabilia & propria seu pathognomica, quatenus nimirum morbi essentiam absoluunt & indicant, cumque eo necessario cohærent, ideoque mox in principio adsunt, semperque affectum vsque ad finem comitantur, verbo, formale morbi.

Si-



Signum igitur essentialiale ratione vocis geminæ febris ephemeræ duplex hoc loco esse potest, commune & proprium. Commune cum aliis, est calor febrilis, latius sumtus, cuius conditio consideranda (1) ratione modi inuasionis, statim enim a principio incipit, totus repente accedit, æquali gradu permanente, cum absentia sensus rigoris extremitatum, quod ordinarie fit. Quandoque tamen coniungitur, sed leuis saltim, ab ἀδιαπνευσία, vel frigore, idque duntaxat cum cacochymicum corpus expirationem multam eamque calidam & acrem diffundit, quæ, ob cutem a frigore densatam, aut ob exilium meatuum constipationem, suppressa ferit partes neruofas, vel causa quoque priuatiua exorta, & hoc extraordinarie magis. (2) Ratione motus, inseparabile quoq; indicium inquit *Galenus l.1. de diff. febr. c.8.* est æqualis & liber ascensus in caliditate & pulsibus simul; non tamen proprium, quamvis his maxime insit, cum & aliis quibusdam commune, (nempe synochis & hecticis, in quibus etiam calor æqualiter, neque cum rigore inuadit) sicut etiam consistente febre mediocritas.

Proprium vero, quod ephemeræ præcipue conuenit, est calor obseruandus ratione qualitatis, est enim mitis ac suavis, respectu aliarum febrium, non tactu acris, sed halituosus, absque mordicatione & punctura, uti in putridis, sed talis, qualis in exercitatis valde, iratis ac ebriis deprehenditur. Denique ratione typi, seu quantitatis & durationis, continuus ille calor durat saltim diem naturalem, XXIV. horarum spatio inclusum, & in declinatione venit ad perfectam ἀπουσίαν, exacerbatione simul & semel plenarie sedata.

Patefaciunt eandem POST - ESSENTIALITER CONSEQUENTIA, symptomata omnis generis, actionum læsarum, excretorum & retentorum, & qualitatum mutatarum. In facultate naturali, nullum præcedit cibi fastidium, nisi a repletionem nauseabunda; nulla adest spontanea corporis lassitudo, neque grauior somnus, neque horror & oscitatio, nullus capitis dolor, & ventriculi corporisque inquietudo deprehenditur in animali, comparatione cum reliquis facta. Contra ea pulsus ad harmoniam naturalis magis inclinatur, celer, sed magis æqualis. Respiratio minus



minus citatur ; in excretis vrina quoque saturatior paulo, sed breui mutata in melius, quod & de cruditate prauia, v. g. ab ebrietate intelligendum. Sudor largior, *Galenol. 1. de diff. febb. c. 7.* edifferente, in declinatione emergens exactum ephemeræ est signum, suauis enim vapore vel blando & benigno madore prævio, integra cessatio sequitur, quam integritas perfectæ sanitatis excipit iterum.

Confirmant idem CAUSAE PRAEGRESSAE euidentiores, febris huius paratiæ, per supra dicta, quæ ex relatione ægri & adstantium patefiunt, adeoque non difficulter eruuntur, quomodo characterem febrilem impresserint lymphæ. Sic ab ardore solis, mora longiori in aere æstuante prægressa, non defensa satis parte, calor manifestum vredinis sensum eidem infert, seu caput fuerit inprimis, seu manus circa carpum, ex quo centro tristis sensus diffunditur in vicinum clima, & pulsu teste in reliquum corpus.

Sic assumpta alimentosa vel medicamentosa ephemeram induxisse, ex eorundem substantia, quantitate, proportionem & qualitate deprehenditur. Sic motus, vigiliæ, & reliquæ res nonnaturales, causæque euidentes latere nequeunt, modo & provide inquirantur ab artifice, & candide recenseantur a patiente vel adstantibus. Quæ etiam variant circumstantiæ phænomena, modificare quidem eadem, prout quælibet causæ agunt diuerso gradu, queunt, re ipsa tamen satis constante.

Cognitiæ exacte ephemeræ facilis hinc & benigna consequitur PROGNOSIS, ratione SALVTIS & MORTIS. Et quidem in genere ex sui natura non est periculosa, sæpe absque medici auxilio per se cessat, citiusque abit quam cognoscitur. Qui vero diariam rite cognouerit, statim poterit prædicere eam esse breuem, nec ultra terminum sæpe dictum duraturam. Exquisita enim periculo caret, inprimis si principium bene tolerare possunt, & minus maligna sed leuia eaque pauca adsunt symptomata. Imo & ob breuem,



durationem, accedente inprimis periti medici prouidentia, corpus nostrum leuiter saltim afficit, nec multum affert incommodi; & quemadmodum originem habet in subiecto minus stabili, sed tenuissimo & facile reparabili, seu vt eius generatio celer, ita solutio talis quoque erit. Non tamen est negligenda, quamuis velocis & bonæ terminationis sit, cum possit propagines malas gignere, & per accidens periculosa fieri terminatione & degeneratione in alias, ex incuria maxime & negligentia ægrorum.

Prædictio hinc desumenda a causarum, a quibus producuntur, diuersitate earumque vehementia, vnde facilius vel difficilius tolluntur; hoc si fit, ne degenerent in alias febres, periculum adest. Sic ex cruditate & corruptione ciborum nidorosa, inprimis si aluus fuerit lubrica, minus noxia; si adstricta, grauior est & periculosior. Sic quoque si ab adstrictione cutis vel a *συσπώσει*, minus manent intra terminos ephemerarum, illæ enim simplicem non solum intemperiem, calidam excitant, sed & vitiosos humores in corpore vel generant vel retinent. Hinc sæpenumero, in cacochymicis præcipue, in putridas post aliquot dierum cursum, aut, si mitiores humores, in synocham citra putredinem, seu *πολυμήρειον* transeunt. Si magna obstructio facta sit, autore *Galeno* l. 8. *M.M. c. 4.* febris non erit ephemera.

Si ab inedia eaque longiori oriatur, facile in hecticam transire potest, disposito inprimis corpore sicciore. Animi affectus subiti sponte fere cessant, leuiioresque pariunt ephemeræ; ex vigiliis tamen qui ea laborant, facile in ardentem incidunt, humoribus plus iusto fufis ac calefactis. Ab inflammationibus externis, (ab internis vero viscerum peiores sunt,) vt ex inguinum tumoribus seu bubonibus, vbi calor ephemeræ saltem est consensualis, si omnia accidentia statim minorentur, salubris erit, hinc & *Cous 4. aphor. 55.* omnes febres ex bubone præter ephemeræ malas pronunciat. Quando



do vero causarum diuturnitate ultra diem perdurant in corpore plethorico, degenerant in synocham. Sic a medicamento caustico continuato nimis in corpore bilioso exsanguis oborta ephmera, cum dolore intensissimo in hecticam trasmutata fuit, apud *Forest. Obs. 7. l. 1. Schol.*

Ratione LONGITVDINIS & BREVITATIS, exquisita nomini conformem seruat terminum & desistit post primam accessiōnem; minus legitima ad triduum vel quatrimum prolongatur, & si longius perduret, nomen amittit. Vbiuis vero a posteriori magis hæc longitudo & breuitas, imo tota febris æstima-

MODVS EVENTVS duplex esse solet, vel *solutio benigna*; quæ vix nisi ἀκρότως paulo κρίσις appellari meretur, quippe non morbus acutus est, quia brevis & levis, caretque malis accidentibus illi familiaribus. Terminatur ordinarie sudore vaporoso naturali non admodum multo vel largiore, sed leui, aut madore pauco, soluiturque sic absq; omni exacerbatione, sibi relicta. Vel *degeneratio* in alias deteriores, siquidem vel ob vitiosam corporis affecti constitutionem, vel ob commissum nouum in aliqua diætæ parte aut medicamentis errorem, vel ipsius fermenti prorogatum fomitem, mutationis periculum verendum est, quod sit in genere, si ultra statutum tempus diutius perduret quam par est, nec sudor cum ἀπυρεξία plenaria & pulsu æquali acciderit, vel si æger sudauerit, tamen ex integro non desinat febris, *elogio 4. aphor. 56.* vel si dolor capitis, comitans ephemeram, perseverat constanter; quæ monstrant in aliam conuerti febrem, per propria signa eruendam.

Præstat hinc & medicum & ægrum cautum esse. Medicum, ne statim febris signis præsentibus vel ephemeram exclamet, adeoque negligat, fallendus facile insidiis, & morbi statu immutato, vt quod turpe est eidem non minus ac duci bellico, dicere cogatur: non putaram. Ne item febrim reuera diariam, vel quasi talem, eamque sua natura leuiculam & breui desituram, præcipitet in aliam, vel prognosi lata, vel male tractato morbo. Ægrum vero, ne in crastinum differat res serias, hostemque vel



negligat, vel plus iusto timeat, in eosdem offendens scopu-  
los.

## C A P V T VII.

De

### *Curatione generali, & speciali ex fonte Chirurgico.*

**C**ognita hactenus febris ephemeræ natura cum suis cau-  
sis & signis, CVRATIONEM vt jam, tanquam præcipu-  
am medendi partem, subjungamus necesse est. Vtut ve-  
ro communiter nec difficilis videatur earum curatio, nec utilis,  
quod per se mediante sudore cessare soleat, & raro ad eius cura-  
tionem vocetur medicus; cum tamen non sit vnius generis, cum  
facile in alias grauiiores degenerare queat, & principiis obstan-  
dum sit, nec leue quoque negligendum incendium, præstat vbi-  
uis circumspectum esse, nec in his imparatum offendi medicum.

Absoluitur autem, ex Methodi Medendi legibus, tribus  
INDICATIONIBUS, CURATORIA, PRÆSERVATORIA, & VITALI.  
CURATORIA motos componere fluctus, & massæ sanguinæ  
illatum feruorem debite compescere, adeoque fermenti  
peregrini distillationem attendere jubet. PRÆSERVATORIA  
causas fouentes respicit, auferendo præsentis, materiale in-  
cendii, restaurando defectum absentium, & maxime fermenti  
multiplicationem. VITALIS virium, spirituum, lymphæ,  
viscerum tonum ac robur & hic, quantum opus, cordi habet.

Hisce indicationibus præsidii ex triplici possumus sa-  
tisfacere fonte, & quidem Chirurgico, Pharmaceutico & Dia-  
tético. Si vllibi vero, sane in ephemera in singulis præsi-  
diis attendenda est methodus Hippocratica & probe distin-  
guenda, *πρὸς τὴν καὶ ἀπαρίσκει* constans, ne ordo invertatur  
temere.



EX CHIRURGIA primum occupat locum venæ sectio, magnum & generosum nimis remedium, febrique huic minus fere proportionatum. Qui facile venæ sectionem indulgent, eique fauent, & in ephemera illam admittere leguntur, ad ventilandum sanguinem mature, & particulas calidas, ne accendantur, remouendas, vt etiam apud *Willisium l. de febb. c. 8. p. m. 163.* in iuvene, habitu corporis athletico, ab immodico vini generosi potu, admissa fuit. Res eo redit, vt summam nos expediamus, venæ sectionem non conuenire nisi a causa positiua, eaque urgente, metu grauioris mali, ab euacuatione aliqua sanguinis suppressa, corpore plethorico, adeoque præsentē indicatione. Sic si mensium fluxus non eueniat, prægressa ira, ac febris eiusmodi accidat; si a vulnere capitis, præsentibus laudatis circumstantiis, inflicto ebrio eadem eueniat, & similibus aliis, ægro præsertim adsueto, admitti potest. Si item extendatur paulo, maxime synochæ facie apparens, locum eadem habet; in aliis vero casibus non temere, hoc quidem titulo ephemeræ, instituenda. Idem dictum esto de CVCVRBITVLIS, venæ sectionis succedaneis, quæ tamen aliis in febribus vniuersali nomine minus frequentantur.

Referendæ quoque huc FRICTIONES, in hac febre antiquitus vsurpatæ, quæ certis casibus non sunt de nihilo, ad promouendum transpiratum, in primis si cutis densior & adstricta, vel occasione bubonis, & rheumatismi alicuius morbus enatus fuerit; laxant enim & aperiunt poros, vt materia in halitus conuersa euacuetur, & perspiratio liberior reddatur, calorque natius roboretur. Curandum vero, vt leuiter & molliter peragantur, nec longæ sint, alias magis attrahuntur humores, & affluxus citatur. Simul vsum inueniunt, adhibitis pulueribus cypriis, in capite, in crinonibus, litibus ex melle & aliis, quorum & vnguentum *Aetii* ex nitro & oleo retuleris.

Et INUNCTIONES enim eiusmodi olim quoque solennes erant in ephemera curanda, hodie itidem rariores, præterquam topica, seu locali indicatione præsentē.

BALNEVM sequitur, cuius olim in ephemera potiozem habebant rationem, eoque vt plurimum solo, habita simul victus ratione, cu-



ram instituebant, quod *Galennus* propria experientia *l. 1. diff. febb. c. 2.* testatur, quando scribit: nos vero re ipsa hoc millies probauimus, prima accessione finita lotum hominem, ac post mediocri cibo resectum, ad consuetam opera transmittentes, ut qui alteram febris accessione sensurus non esset, neque nostra nos fefellit opinio. Verum est, iuuat balneum diarias, uti cum *Hollerio* plurimi eius virtutes collaudant, si ab vredine, quia refrigerat & humectat, si a frigore, calefacit, si a lassitudine & rarefactione cutis nimia lassatum corpus, reficit, si a cutis adstrictione & siccitate, relaxat ac humectat.

Cum vero apud Europæos & imprimis Germanos tanta balneandi frequentia, & in illis apparandis diligentia, ac antiquitus Ægyptiis & hodiernum adhuc locis calidioribus & orientalibus obseruata, minus in usu sit, corporaque haud promiscue, ut illis, in balneum mittenda, utpote quæ impuritatibus sæpissime scatent, hinc plus damni iis afferri posse verendum, ne actuantur magis cruditates, ut faciliorem accensionem subire valeant.

Hinc *Trallianus* non incongrue optimum quidem & præcipuum defatigatis lauacrum scribit, sed citra rationem adhibitum non paucos insigniter offendere, plethoricos & cacochymicos. Adde ex cruditate, repletionem, retentis euacuandis, fluore alui vel catarrho aliisque enata. Eorum vero in locum pediluuium in vigiliis, lassitudine, motu fortiori & aestu solis causæ vicem subeuntibus, substituendum, vel abstersiones cutis sudorumque aqua tepida, seu fotibus, ex emollientibus, abstergentibus, & roborantibus, decocto *serpill. capill. & is, hysop. organ. chamom. melilot. fœnic.* & aliis institutas suademus.

## CAPUT IIX.

De

### *Remediis Pharmaceuticis.*

**C**Hirurgiam excipit PHARMACIA, quæ sub se comprehendit & Purgantia & Alterantia, interna & externa.

Euacuantia hic prima fronte non æque necessaria apparent, neque iis promiscue curatio occipienda, vel absoluenda.

Non



Non habent locum, si a causa priuatiua oriundus sit morbus; habent, quando fomes in primis viis hæsitat, aluo adstricta, cruditatibus, flatibus coniunctis, præuia ebrietate & infarctu minus superando, nisi fiat euacuatio. Ita vero in prima herba extingui potest morbus, minera pituitosa vel biliosa ablata, vocando in vsum **LENIENTIA**, e *sirup. rosar. solut. pilul. aloët. violat. rosat. aloephangin. fennat. elect. lenitiv. pulpa tamarind. spec. diasenn. brodio laxatiuo*, acuendo  $\text{♂}$  *Pro*  $\text{⊕}$  *lat. crysall. vel cremore*  $\text{♀}$  *ri*. Et vel Clyster leniens & refrigerans suffecerit, vbi aluum expedire ex vfu videatur, ex radicibus herbis & floribus emollientibus, cum appropriatis scopo remixtis ac apparatis.

**PRÆPARANTIA** & Digestiua magis, vbi mora conceditur, conueniunt; vt & **PURGANTIA** proprie dicta, neque enim hoc loco ultra *fennata*, vel *rhabarbarina*, aliaque id generis excedendum fuerit, imo fere ne his æque opus est.

**VOMITORIA** vero, quando ob cruditatem biliosam vel pituitosam, cum farragine maiori collectam, iis opus videtur, magis præsentaneum edunt effectum, vnde &, ex *Helmontii* mente, & a vomitu, vel peracta digestionem, sponte cessat. Hinc præsentem cruditate tali vel repletionem, præuia ebrietate, vel congestionem prægressa, cum ructibus & grauitate ventriculi, ne saburra ibi residens massam sanguineam intimius afficiat, emeticum, ad malum radicitus tollendum, propinari potest, data  $\nabla$  *bened. Ruland. ⊖ ⊕ l. ♀ emet. extr. asari*, aliisue in brodio carnis facile assumendis, minori tamen magis dosi. Ita enim & auferre nidum morbosum & anteuertere aliam febrem licebit.

Eodem communi adiumento præsto sunt **DIAPHORETICA** quæ vt febrium sunt panacea quædam, ita & ephemeræ curandæ apprimè debentur, fermentum rarefactiuum corrigere & diffusionem illius tollere, vnaque per blandum sudorem exterminare, apta nata, in quo vnice huius febris solutio & salus consistit. Meliora vero sunt & præcipua *Bezoardica*. Vti enim nusquam tuta fides, ita præstat & hic circumspectum esse & via regia incedere, præcipue in bubonibus, tumore glandularum aliarum, febribus puerperarum, stagnatione lactis, arthritide vel erysipellate quoque imminente, imo & in  
gene-



genere ne in putridam continuam vel malignam fiat conuersio. Profunt hoc nomine præcipue media & aliquanto volatilia, ut *seri* & consequens immutatio fermentifica febrilistanto præsentius expugnetur. Instar omnium esse queunt *Ra bezoardica Rolf. Mich. Wedel. Ludou. mist. simpl. ess. myrrh. balsam. theriacal. liquor C. C. succinat. fermentum bezoardicum viperinum, diascordium Fracast. Sium diaph. bez. minerale, Fle. Ale. pulu. bez. Wed. mai. & min. spec. de hyacinth. pulu. Pannon rub. & alia.*

Ex DIVRETICIS in usum trahenda temperatiora, quæ lympham contemperando & reparando feruorem & sitim mitigant, quatenus sulphur accensum obtundunt, volatilitatem peregrinam rarefacientem fermenti figunt, & scorias biliosas ex massa sanguinea abstergendo per vias urinarias præcipitant & educunt. Inseruiunt huic scopo acidula & alia, ut *Ra fl. 4. cord. bellid. pap. rhæad. & Ois, Oi, Oi philos. Dosa item præcipue, nisi quid obstat, ex clysf. & Aat. & Dulc. & Giat. arc. dupl. aliaque huiusmodi aperientia, quæ & ipsa potui consulto possunt indi, consentiente ventriculi tono & alui statu.*

Colophonem addunt omneque absoluunt punctum ALTERNANTIA, confortantia, cardiaca, principia vitalia, spiritus, sanguinem & lympham moderantia & conseruantia. Sic propinanda frigida & humida ex aquosis acidis & confortantibus spirituosiss, v. g. ex aquis refrigerantibus cordialibus, hepaticis, analepticis, ut *acac. acetos. ceras. nigr. endiv. scorzon. fœnic. fl. borag. bugloss. cinam. f. v. quas cruditas, lassitudo, vigilæ, mœrores & aliæ indicant causæ; ut & ▽ prophyl. Sylv. bezoard. Rul. Cordial. H. S. frig. C. C. citrat. Waldfchmid. Sic ex acidis, præter superius memorata, sir. rub. idai, berber. rib. acetos. citr. corall. julap. violar. comp. ex confortantibus vero conf. de hyacinth. alker. incompl. quæ & in curis & lassitudine tristitiaque conducunt; semina quoque 4. frig. maj. pap. alb. amygd. ambros. aliaque id genus; ex quibus facile julepi, mixturæ, portiones, emulsiones, & aliæ formulæ formari & pro indicantium modulo variari possunt, saporem pro re nata illis sirupo gr. Kerm. pap. rk. gemmat. & dictis aliis conciliando.*



Tacemus roborantia specifica, stomachica, hepatica, vterina, neruina & similia, ex suis loculis sumenda, quæ causam coniunctam & fouentem, vt v. g. cruditatem & vomitum, ictericum insultum, tormina post partum, articulos, & sic porro respiciunt. Hæc enim cum bezoardicis & diaphoreticis maritata specificè magis satisfaciunt indicationibus. Sic colicæ si coniungatur ephemera, & torminibus dictis, carminatiua; sic calculo, resoluentia & anodyna; vomitui theriacalia; arthriticis cinnabarina optimo consilio maritaueris.

Enimvero causæ hæc fouentes in nullis fere febribus magis attendi merentur, vti, præter dicta, sæpe in ventriculo hæret minera, *elix. propriet. Oli Myns. stomach. Mich. Rolf. & aliis corrigenda, additione M. S. v. g. ad febrim simul habito respectu. Vtrobique præcipitantia & confortantia laudem præcipuam merentur, modo securi simus de malignitate, quamobrem sonche præparata, mater perlar. corallia alba & rubra, ebur s.  $\Delta$  ppt. cinnabaris natiua, puluis epilept. March. absorbens Wed. analepticus Minder. spec. diarhodon, diatr. sand. & alia, forma sicca, media, & fluida aptari varie possunt. Præstat tamen semper primarium scopum attendere, nec nimis ad hæc diuertere secundaria.*

Singulis pondus addunt *anodyna*, maxime si a vigiliis, doloribus, diarrhœa, catarrho, euacuatione nimia per hæmorrhagias & aliis morbus fuerit ortus, vt *mag. anodyn. Ra anod. laud. opiat.* reliquis, pro re nata, refracta tamen dosi addenda, vtpote quæ caloris æstum & sanguinis motum concitatiores placant, omniaque indecenti cursu conseruant. Ita vero & symptomatibus satisfat vrgentibus ipsis.

Topica tandem prioribus, ratione indicationis variæ, subordinanda. Sic, si dolores & vigiliæ exuperent, temporibus inungi possunt *ungu. rosac. alabastrinum, populn. & alia.* Epithemata item frontalia ex  $\nabla$  *verben. puleg. aneth. hypnot. Dorncr. ros. fl. sambuc. + rosac. rutac. mithrid. O anod. extr. croc.* profunt. Stomachali regioni, si ex cruditate, ebrietate, repletionem, & vbi roborandum est, applicanda balsama stomachica, sacculi roborantes & carminatiui, emplastrum *de crassa panis, de bacc. laur. stomach.*



*Crat.* Pulsibus epithemata ex *zedoar. sandalis, rosis, spec. diatr. sand. cord. temp. proepith. cord.* cum  $\nabla$  *carf. aur. ros. + ros. & bez.* quæ aliunde satis nota sunt & huc repeti possunt.

## CAPVT IX.

*De Diæta.*

**A**Gmen claudit DIÆTA, seu retum sex n. n. dictarum legitimus vsus. Cum enim ex iis quantitate & qualitate peccantibus frequentissime oriatur, necesse quoque videtur, vt ad eius curam facilitandam earum rectam habeamus rationem.

In VITALI AER sit temperatus, a frigido enim vti transpiratio impeditur, sic a calido febris magis fouetur. Vitetur ergo vterque excessus. Faueat tepor blandus transpirationi, etiam quando a causa calida febris orta fuerit.

In NATVRALI victus in vniuersum sit mediocris, εὐχρηστος & εὐπεπτός, ad frigidum ac humidum inclinans. Quam in rem inferuiunt cremor ptisanæ, juscula auenacea, carnes gallinarum, caponum cum pasfulis, succo citri, lactuca, acetosa & similibus ad gratum saporem condita, quæ vtpote refrigerant, humectant, sitimque placant. Carnes quoque animalium juniorum, vt vitulina, caponum, perdicum, pullique gallinacei & columbini, pisces item saxatiles suo modo concedendi. Vitanda sunt nimium salsa, acria, aromatisata, calidiora, dulcia, facile calorem intendendo fermentationem febrilem conciliantia.

POTVS sit paulo largior, nisi alui laxitas id contraindicet, cereuisia tenuis, hordeacea, & bene defecata, alterata acidulis, decoctum item hordei cum C. C. vt & acidulæ contemperando feruorem prosunt. Vinum non temere concedatur, præterquam ὀλιγοπόγον, ne feruorem conceptum, dolorem capitis aliaque augeat.

In ANIMALI SOMNVS & VIGILIAE, MOTVS & QUIES debitam seruent alternationem, moderatumque vsum habeant, quorum alterutra si excesserint, debitis modis corrigantur. Quie-



ti vero & somno magis indulgeat æger, proximum enim, ex motu laborioso & lassante corpus, vigiliis, inedia, ira &c. excitata ephemera, sunt leuamen, dum reficiunt spiritus viresque restaurant, motum sanguinis retardant ac refrenant, corpus simul humectant ac refrigerant.

Inter EXCRETA Aluus, menses, hæmorrhoides, sudores ordinem suum seruent, quod si non fiat, freno vel stimulo moderanda omnia. Inprimis aluus minus respondens, clysteribus lenientibus, & refrigerantibus, suppositoriisque lubrica reddenda est.

ANIMI PATHEMATATA ad *indignam* componantur tranquillam. Curæ, ira, tristitia exulent.

## SOLI DEO GLORIA.

**N**on vna medicus, ceu fungus, luce diei  
Nascitur, haut anni est vnus illud opus.  
Vel febris monstrat, quæ quanta, diaria, poscat,  
Ne supra sphæram restitet ipsa suam.  
Tu breue, Tu longum spatium superare labore  
Doctus es, vnde Tibi digna tiara venit.

*Plausu votino hoc & gratulatione honores summos  
ex merito Capessenti felices esse exopto*

P R Æ S E S.

**F**ebbris Ephemeris hîc descripta est perbenè, LIEFMANN,  
Dexteritate pari reliquis si feceris artem,  
Febribus, euge! feres ægris tam, quàm Tibi multa  
Commoda, & adsurget non uno fœnore nomen.

*Clarissimo Domino Doctorando  
honores, quos capessit, felices esse precor,  
properante quidem calamo*

RVDOLFVS WILH. CRAVSIVS, D.P.P.



**U**t curas longas peperit Tibi *Ephemera*, longas  
Sic febris laudes ista brevis pariet.

*Gratulationis ergo  
nobilissimo Domino Doctorando,  
Fantori & Auditori suo honoratissimo,  
scrib.*

**JO. HADR. SLEVOGTIVS, D.**  
Anat. Chir. & Botan. P.P. Med. Duc. Sax. Prov.

---

**I**ngeens ächter Sohn! geh zeige dich der Welt/  
Mit dem/was dein Papier gelehrtes in sich hält.  
Weiß auf und laß ich sehn/ was Fleiß/ was Kunst und  
Tugend!

Das Kleeblad edler Zeit für Honig deiner Jugend/  
Bemühter **L E Z E R M A N N**/schenckt: Und mer-  
cke dich dabey/

Daß obwohl deine Schrift von jenem Fieber sey/  
Das einen Tag nur währt/dennoch die kluge Säge  
Selbst die Gelehrsamkeit des Purpurs würdig schätze.

Hiermit sollten bey dem Herrn Doctorando  
ihre Schuldigkeit glückwünschend  
abstatten desselben etliche

**Gute Freunde.**

